

驿丞部汇考

后汉

安帝 年置县五部督邮曹掾一人

按后汉书安帝本纪不载 按百官志安帝以羌犯法三辅有陵园之守复置都尉诸曹掾史本注曰诸曹略如公府其监属县有五部督邮曹掾一人

注
汉官曰河南尹诸县有四部督邮吏部掾二十六人

宋

文帝元嘉四年复置部县有都邮门亭长
按宋书太祖本纪不载 按百官志云云

北齐

北齐制清都郡置督邮曹掾
按隋书百官志云云

元

元制驿传各有主者以典其事
按续文献通考元驿传之制有府寺

通政院兵部

脱脱禾孙站官

有符节

图碑圣

旨札子

有次舍有供顿

马车牛

驴狗轿

驿传之在汉

地者兵部领之在北地者莅以通政院郡邑之都会道路之冲要则设脱脱禾孙之官以检使客防奸非驿各有主者以典其事

世祖至元二十年秋七月丙寅开云南驿路分亦奚不薛地为三设官抚治之

按元史世祖本纪云云

至元二十七年十一月癸亥罢大都东西二驿脱脱

禾孙以通政院总之

按元史世祖本纪云云

至元三十年春正月辛巳置辽阳路庆云至合里宾二十八驿驿给牛三十头车七辆九月戊午敕各路达鲁花赤总管董驿事

按元史世祖本纪云云

成宗大德六年十一月己未诏诸驿使辄枉道者罪之

按元史成宗本纪云云

大德十一年十二月丁巳诏大都上都二驿设敕授官二员余驿一员

按元史成宗本纪云云

明

太祖洪武元年设水马站及递运所后改站为驿驿设驿丞一员所设大使一员俱未入流

按续文献通考云云

洪武六年定诸府设所属衙门水马驿驿丞一人

按续文献通考云云

宣宗宣德四年令贵州所属驿丞照云南事例考核按明会典凡驿递闸坝官旧制俱三年赴部给由惟云南驿丞各以三年一次赴布政司考核九年通考然后赴部宣德四年奏准贵州所属驿丞照云南事例考核

英宗正统元年令各处水马驿丞递运所大使九年将满吏部预选官交代

按明会典正统元年奏准各处水马驿丞及递运所大使九年将满吏部预选官交代住俸管事新官至日方许给由

正统三年令驿递官各听所辖考察类进仍候九年赴部通考

按明会典正统三年奏准驿递官直隶府州县所辖三年赴部其有布政司所辖三年赴布政司并按察司考察称职平常复职仍将牌册年终类进九年赴部通考

正统五年令南北直隶驿递官赴巡按考核仍候九年赴部通考

按明会典正统五年奏准南北直隶驿递官三年赴巡按御史考核定与称职不称职考语连牌册发有司收候年终类缴九年赴部通考

景帝景泰元年令南北直隶驿递官各赴本部考满升用

按明会典景泰元年奏准南北直隶驿递官三年六年考满南直隶者赴南京吏部北直隶者赴吏部又凡驿丞九年考满册内事迹不开报应付过使客备细花名起数者送问又凡驿递等官无过升一级有过本等用

皇清

康熙七年

大清会典康熙七年定在外直省各承宣布政使司所属衙门陕西凉庄道所属各驿驿丞十八员各提刑按察使司所属衙门西宁道所属各驿驿丞六员宁夏道所属各驿驿丞三员各府州县水马驿驿丞一员

康熙九年

大清会典国初各官品级满汉间有不同康熙九年改归画一未入流驿丞

驿丞部艺文一

馆驿使壁记

唐柳宗元

凡万国之和四夷之来天下之道涂毕出于邦畿之内奉贡输赋修职于王都者入于近关则皆重足错毂以听有司之命征令赐予布政于下国者出于甸服而后按行成列以就诸侯之馆故馆驿之制于千里之内尤重自万年至于渭南其驿六其蔽曰华州其关曰潼关自华而北界于栌阳其驿六其蔽曰同州其关曰蒲津自灞而南至于蓝田其驿六其蔽曰商州其关曰武关自长安至于盩厔其驿十有一其蔽曰洋州其关曰华阳自武功而西至于好畤其驿三其蔽曰凤翔府其关曰陇关自渭而北至于华原

其驿九其蔽曰坊州自咸阳而西至于奉天其驿六其蔽曰邠州由四海之内总而合之以至于关由关之内束而会之以至于王都华人夷人往复而授馆者旁午而至传吏奉符而阅其数县吏执牒而书其物告至告去之役不绝于道寓望迎劳之礼无旷于日而春秋朝陵之邑皆有传馆其饫飧饗馈咸出于丰给缮完筑役必归于整顿列其田租布其货利权其入而用其息于是有出纳奇赢之羨勾会考校之政大历十四年始命御史为之使俾考其成以质于尚书季月之晦必合其簿书以视其等列而校其信宿必称其制有不当者反之于官尸其事者有劳焉则复于天子而优升之劳大者增其官次者降其调之数又其次犹异其考绩官有不职则以告而罪之故月受俸二万于太府史五人承符者二人皆有食焉先是假废官之印而用之贞元十九年南阳韩太告于上始铸使印而正其名然其嗣当斯职未尝有记之者追而求之盖数岁而往则有之矣今余为之记遂以韩氏为首且曰修其职故首之也

驿丞部艺文二

诗

赠馆驿刘巡官

唐赵嘏

云别青山马踏尘负才难觅作闲人莫言馆驿无公事诗酒能消一半春

寄余驿丞

明张宁

南熏亭馆晚相延屈指星霜又十年不是重来浑忘却黄口舟过驿门前

马道驿丞歌

张佳引

马道驿臣八十五身寄西秦家东鲁耳聋齿脱鬓如霜出入逢迎状伛偻路接青桥与武关栈道崎岖无与伍不卑小官有展禽不薄乘田有尼父尔心岂是学圣贤蜗角蝇头良自苦余也东朝师保臣刚生六十负君亲抗章十数不得请今始给驿归梁岷宦情见尔如胶漆方信余为勇退人

驿丞部纪事

汉书魏相传相为茂陵令御史大夫桑弘羊客诈称御史止传丞不以时谒客怒缚丞相疑其有奸收捕案致其罪论弃客市茂陵大治

黄霸传霸为颍川太守使邮亭乡官皆畜鸡豚以贍鰥寡贫穷者

后汉书赵孝传孝父普王莽时为田禾将军任孝为郎每告归常白衣步担尝从长安还欲止邮亭亭长先时闻孝当过以有长者客扫洒待之孝既至不自名长不肯内因问曰闻田禾将军子当从长安来何时至乎孝曰寻到矣于是遂去

刘宠传宠历宰二郡累登卿相而清约省素家无货积尝出京师欲息亭舍亭吏止之曰整顿洒扫以待刘公不可得也宠无言而去时人称其长者

玉泉子裴均仆射之镇襄州也郑滑馆驿巡官裴弘泰光聘至驿值彼大宴客司漏名及设定令人召屈遂奔至均大不悦因责之曰君何后来大涉不敬时酒已数筹弘泰曰都不见客司报宴非敢怠慢然叔父检罪请尽饮在坐器物仍欲乞饮尽赐弘泰上件器物可否合坐皆壮之均亦许弘泰弘泰遂次第揭银器饮之饮讫即置怀中须臾盈怀盘中余一银醢受一斗已上其酒亦满弘泰捧之而饮均亦令吏去醢覆中饮讫踏其醢抱之而出请壮马归驿均以弘泰饮酒必过量所伤忧之使吏问饮后所宜使者方见弘泰戴纱帽于厅上秤器物正重二百余两均不觉大笑回车赠赏甚厚

唐书裴潏传元和初两河用兵宪宗任宦人为馆驿使检稽出纳有曹进玉者尤恃恩倨甚使者过至加挫辱宰相李吉甫奏罢之会伐蔡复以中人领使潏谏曰凡驿有官专尸之畿内以京兆尹道有观察使刺史相监临台又御史为之使以察过阙犹有不职则宜明科条督责之谁不惕惧若复以宫闈臣领之则内人而及外事职分乱矣夫事不善诚于初体有非不必大方开太平澄本正末宜塞侵官之原出位之渐帝虽不用而嘉其忠

柳公绰传公绰长庆元年复为京兆尹时幽镇用兵补置诸将使驿系道公绰奏曰比馆递匱乏驿置多阙敕使衣绯紫者所乘至三四十骑黄绿者不下十数吏不得视券随口辄供驿马尽乃掠夺民马怨嗟惊扰行李殆绝请着定限以息其弊有诏中书条检定数由是吏得纾罪

墨客挥犀旧制三班奉职月俸钱七百驿券肉半斤大中祥符中有人为题诗所在驿舍门曰三班奉职实堪悲卑贱孤寒即可知七百料钱何日富半斤羊肉几时肥朝廷闻之曰如此何以责廉隅遂议增月俸

金台集刘蕢昌平人历辽金无能发潜德者天历间昌平驿官宫祺始奏建刘谏议院

驿丞部杂录

墨客挥犀岭南僻远之地有驿名翠岚往来宿者多饲马于堂上驿吏谏谕不听乃题小诗于壁以讥之曰犬马本非堂上物莫言驿舍暂经过大都人畜须分别不禁莺声可奈何莺声之喻盖昔人曾有为驴吃牡丹赋云展侣铁之双蹄惊回蝶梦耸如船之两耳不听莺声驿吏之意出于此